

乾隆杭州府志

杭州府志卷五十一

郵政

國朝 歷代 育嬰堂養濟院附

前史載蜀卹之令漢文帝免田租三分之一當時已誇爲
僅見唐宋以後間有舉行僅存故事

熙朝軫念黔黎痲瘵在抱

仁滂恩溥懋洽春膏凡蠲稅緩征恤孤養老諸政俱卓越千古
恭紀於冊而以歷代之制附見焉

國朝 順治四年二月十二日欽奉

恩詔內開

一浙江人丁地畝本折錢糧併衛所屯糧除杭嘉湖三府業經

該總督題准照平南恩詔開徵今浙東八府俱自順治四年正月
月初一日起通照前朝萬歷四十八年則例徵收天啟崇正加
派盡行蠲免其唐魯二藩僭號竊據疊派橫徵地方尤稱苦累
一切悉行停止以蘇民困有司借名私派加耗虐民者事發治
以重罪

一關津抽稅原屬譏察非欲困商明末疊增數倍原額已經戶
部題定照萬歷年間原額及天啟崇正遞增額數一半徵收杭
州南北二關先已差官其餘自順治四年正月初一日以後俱
照此例一體抽徵其州縣零星抽取落地稅銀名色槩行嚴禁
違者重治

康熙四十六年十月戶部爲續報夏旱等事覆准浙省錢塘富陽壽昌分水四縣并湖州所被災田畝應免銀一萬九百六兩五錢零十一月又覆准新城等八縣衢嚴二所被災田畝應免銀四萬七千七百一十六兩照例蠲免仍動常平倉米穀賑濟

康熙四十七年九月二十四日欽奉

恩詔內開

一江南浙江二省今歲俱有被災州縣應酌留漕糧爲平糶散賑之用每省應截留若干石該部確議具奏又浙省餘杭等州縣秋月狂風暴雨致民間屋廬傾圮生齒仳離江船漂損人口

淹沒田禾悉被災傷殊可惻惻着該撫行該地方官察明人戶數目應作何賑恤速議具奏

康熙四十七年十一月大學士馬齊等爲欽奉

上諭事議覆浙閩總督梁鼐摺奏前事該臣等議得漕糧關係天儲例不蠲免截留平糶及酌量改折皆出自

特恩今該督既稱杭州湖州兩府屬被災八州縣各戶漕糧實難輸納請准今年徵收一半明年帶徵一半似屬可行計八州縣應納漕糧共三十六萬八千九百三十四石零應行令今歲徵收一十八萬四千四百六十七石零起運其一半俟明年帶徵完納奉

旨依議速行

康熙四十九年三月戶部爲三懇

皇恩以紓民力事議覆浙江巡撫王度昭題前事該臣等查杭湖二府八州縣緩徵康熙四十七年漕糧一十八萬四千餘石先完一半搭運赴通現今民力艱難應如所請將未經搭運一半米石于今冬作速照數徵完帶運赴通可也奉旨漕糧例不蠲免念浙省被災之後民力艱難這緩徵漕米九萬二千餘石着免徵收

康熙五十三年十一月戶部彙報秋旱等事覆准浙省錢塘富陽餘杭新城仙居麗水縉雲松陽西安龍游常山永

康武義等十三縣并衢州所被災田畝應免銀四萬九千六百四十二兩二錢零照例蠲免仍令作速查明災民動常平倉米穀賑濟

康熙五十六年正月戶部爲彙報秋旱等事覆准浙江新城諸暨武義西安江山常山分水等七縣衢州一所被災田畝應免銀二萬八百二十八兩八錢零照例豁免其被災黎民動截留漕米委員賑濟仍于被水被旱成災不成災地方均行平糶至被災各州縣現年應徵地丁錢糧舊欠漕項地丁銀米均令暫緩催徵

康熙五十八年十月戶部爲彙報亢旱等事覆准浙省夏

秋之交雨澤愆期錢塘富陽蘭谿東陽義烏永康武義浦
江湯溪西安龍游江山常山開化建德淳安遂安壽昌桐
廬縉雲等二十一縣并衢嚴二所被災田畝應免銀九萬
五千二百五十七兩七錢零照例蠲免卽動存倉米穀遞
委賢員按明戶口散賑

康熙六十年十一月戶部爲彙報秋旱等事覆准浙省仁
和等二十三州縣衢嚴二所被災田畝應免銀五萬五千
四百一十二兩七錢零十二月又爲續報秋旱等事覆准
於潛等十一州縣并杭湖衛所被災田畝應免銀三萬二
百四十七兩七錢零前項被災田畝應免銀兩與例相符

照例蠲免至成災地方本年應徵錢糧緩至六十一年麥熟後徵收仍將各府備賑米穀動支散賑

雍正元年十一月戶部爲彙報秋旱等事覆准浙江富陽等二十九州縣被災田畝應免銀八萬六千九百五十七兩一錢零十一月又爲續報秋旱等事覆准仁和等二十一州縣被災田畝應免銀五萬七千五百九十八兩三錢零前項被災田畝應免銀兩與例相符照例蠲免至被災地方應徵本年錢糧俟雍正二年麥熟後催徵其應賑被災黎民該撫照例按口煮賑

雍正元年十一月十一日戶部奉

上諭杭嘉湖所屬被災十四州縣額徵漕米三十二萬石令徵收一半改折一半俾地方多存米十六萬石以濟民食改折之價照康熙九年例每石折銀一兩其徵收一半漕米俱令紅白兼收

雍正四年十月戶部爲彙報杭嘉湖府屬雨水情形等事覆准浙江仁和錢塘石門安吉歸安烏程長興武康等九州縣湖州一所被災田畝應蠲免銀三萬三千五十八兩四錢零照例蠲免至被災地方新舊應徵錢糧俱緩至來年麥熟後徵收仍動存倉水穀按明戶口散賑

雍正四年十一月戶部咨覆浙江巡撫李衛奏稱浙江杭

嘉湖三府所屬之仁錢等十州縣一所其中地勢窪下者于本年八月初七八等日陰雨連綿緣太湖等處水洩不及以致低田被淹今據各地方里民呈稱漕糧爲數甚多今秋田禾正值開花結秀之時水浸已久低處稻旣無收高處米色亦不能佳難輸正供若欲遠方買糴不但民力艱難且恐致悞冬間漕限懇爲題請仍照雍正元年改折一半每石交銀一兩并准紅白兼收之例庶得勉力措納

臣細加確查此十州縣一所內除餘杭縣旋即水退勘不成災並湖州一所例無徵納漕糧外其餘九州縣高田尙可收成惟低窪被災傷重以通縣計之不過十分之一二

三四分不等若將實在災田應納漕米改折爲數無多但平地禾苗亦經水浸卽高處有收之田其米亦皆青腰白穢濕潤細碎民間日用則可若以之完漕州縣不敢收倉旗丁不肯受兌倘責令買糴則近處米色相同而江省湖廣向來出米之處亦有被水州縣較前出米頗少民力實有艱難可否仰邀

皇恩照雍正元年之例懇將成災低田漕糧每石仍舊折徵銀一兩其餘被水州縣今年漕米暫令紅白兼收尖圓並納則于漕糧無虧而小民感戴

天恩實同覆載矣奉

旨着照該撫所請行

雍正五年二月戶部爲彙報杭嘉湖府屬雨水情形等事
議覆浙江巡撫李衛疏稱仁和等九州縣一所田畝被淹
仰蒙

皇恩賑濟臣查現在被災里民近今猶有殘粒泥米可以餬口惟
至來年二三月間青黃不接之際實屬艱難伏念發賑原
以濟急當現在稍可自濟之時暫緩散給留至過歲二月
前後求食艱難之日散賑使之實得藉以餬口一轉移間
先後緩急似爲得宜等因前來查仁和等州縣所被災里
民該撫既稱現在稍可自濟暫緩散給應令該撫俟青黃

不接之時出示曉諭照例按口散賑務使正實災民均沾
實惠可也奉

旨依議

雍正五年二月初九日欽奉

上諭浙江杭嘉湖三府收成歉薄着動庫銀四萬兩或開河道或
修城垣令小民傭工餉口

雍正五年十一月戶部爲彙報偏災等事覆准浙江仁和
錢塘餘杭臨安新城安吉長興武康德清鄞十州縣并杭
州前右二衛本年七月間山水暴漲被淹田畝應免銀一
萬四千六百五十九兩三錢零又石壓水衝成溪田畝應

免無徵銀三十八兩九錢零米二十二石五斗零應照例蠲免其本年應徵錢糧緩至雍正六年麥熟後催徵至漕米照浙省支給運丁行糧例每石以一兩二錢折徵完報
雍正九年十一月十一日欽奉

上諭浙江嘉興府屬七縣並杭州府屬之海寧一縣小有蟲災本年應完漕米照雍正元年例每石折徵銀一兩

雍正十三年正月戶部爲彙報浙屬山田被旱等事覆准浙江杭州府屬之新城縣嚴州府屬之分水縣上年夏末秋初雨澤愆期高阜山田間有被旱勘實成災田畝蠲免錢糧并將乏食窮民動支賑濟共賑過男婦大口三萬一

千七百三名小口一萬一百七十九名

乾隆十六年八月戶部爲彙報浙屬被旱被蟲等事覆准
浙江海寧等五十七州縣玉環一廳杭紹二衛湖衢嚴三
所并大嵩等八場今歲入夏以來霖雨少降閏五月內天
氣亢暘殊甚在地勢低窪者雖皆車戽種植而高阜之處
未得栽種齊全浙東八府自交六月之後尙不得有透雨
卽沿近河港之地水亦乾涸田禾因被旱受傷復生蟲孽
除勘實成災田畝蠲免錢糧外所有乏食窮民卽動存倉
米穀遴委賢員按明戶口散賑

乾隆十七年十月戶部爲彙報被水情形等事覆准浙江

仁和海寧山陰蕭山諸暨上虞等六縣并仁和一場本年七月十六十七等日風雨狂驟兼值潮水汎濫田禾被淹沿海房屋間有衝坍勘明被災戶口照例撫恤

乾隆二十六年十月戶部爲彙報被水情形等事覆准浙江仁和等十縣湖州一衛并仁和等五場本年七月十八十九等日颶風大雨山水江湖同時並發田禾間有被淹勘實成災分數分別加賑

乾隆二十七年三月初七日欽奉

上諭前經降旨將江蘇安徽浙江積欠地丁概予豁免而浙江一省積欠較少今翠華蒞止體察民情宜再加恩以示鼓勵

着將浙省所有乾隆二十三、四、五、六等年災緩帶徵未完地
丁屯餉等銀五萬三千餘兩災緩未完及二十五年以前民
欠未完漕項銀十一萬餘兩並水鄉竈課未完銀十萬一千
餘兩通行蠲免俾閭閻得以均沾渥澤該部遵諭速行欽此
乾隆二十七年十月戶部爲彙報偏災情形等事覆准浙
江仁和等十九州縣杭州一衛湖州一所仁和等七場今
歲入夏以來雨澤愆期七月初七并十二三等日風雨狂
驟潮水迅發勘明被災田畝照例蠲賑

二十七年奉文賑濟錢塘縣極貧災民共計一萬七千八
百八十戶男婦大口二萬六千五百七十九口小口四千

七百七十八口計賑二月共米四千三百四十五石二斗
又折給銀五千四十四兩四錢三分二厘次貧災民一萬五
千三百三十八戶男婦大口二萬五千三十五口小口四
千八百八十八口計賑一月折給銀四千七百八十一兩
三錢四分六厘

賑濟仁和縣極貧災民二萬一千八百六十六戶男婦大
口三萬六千八百四十一口小口一萬五百五十三口計
賑二月共米六千三百十七石六斗二升五合又折給銀
七千三百二十八兩四錢四分五厘次貧災民九千七百
八十七戶男婦大口一萬三千七百五十口小口五千三

百九十三口計賑一月共折給銀二千八百六十一兩六錢九分一厘

賑濟仁和場極貧竈丁一千二十五戶男婦大口一千八百六十七口小口九百四十口計賑二月共米三百五十五石五斗五升又折給銀四百六兩六錢三分八厘次貧竈丁一萬四千二戶男婦大口一萬九千一百口小口一萬二千六百一十口計賑一月共給銀四千四百二十兩四錢七分

賑濟海寧縣極貧災民三千三百六十七戶男婦大口一萬一千三百九口小口二千八百六十四口計賑二月共

米一千九百十一石一斗五升又折給銀二千二百十六兩九錢三分四厘次貧災民二千三百三戶男婦大口九千三百三十七口小口三千七十七口計賑一月共折給銀一千八百九十二兩三錢三分七厘又海南公地賑濟極貧災民三百五十九戶男婦大口六百九十四口小口三百四十八口計賑二月共米一百三十石二斗又折給銀一百五十一兩三分二厘次貧災民二千三十戶男婦大口四千五百八十四口小口二千八百三十七口計賑一月共折給銀一千四十四兩四錢三分五厘又北沙時和字號賑濟極貧災民四百六十三戶男婦大口六百九

口小口二百三十二口計賑二月共米一百八石七斗五升又折給銀一百二十六兩一錢五分

賑濟餘杭縣極貧災民九千三十九戶男婦大口二萬二千一百二十五口小口九千四百五十四口計賑一月共折給銀四千六百七十二兩二錢四分八厘

乾隆三十一年五月戶部爲欽奉

上諭事議覆浙江巡撫熊學鵬疏稱乾隆三十年浙省杭州府屬之仁和錢塘紹興府屬之會稽蕭山新昌台州府屬之寧海天台嚴州府屬之桐廬分水等九縣台州一衛嚴州一所并仁和浦東橫浦等三場秋禾被旱除仁和錢塘會

稽蕭山桐廬分水等縣仁和浦東橫浦三場嚴州一所勘不成災外新昌寧海天台三縣台州一衛勘實成災分數經臣題明並請酌給籽本應徵各項銀米照例蠲緩應徵漕項錢糧案具題請

旨勘不成災之仁和等縣所場貧乏之戶請于來春借糶兼行其有漕之仁和錢塘二縣上年冬徵漕米題請緩俟今年帶徵起運在案等語查先據該撫熊學鵬題報仁和等縣場衛所乾隆三十年秋禾被旱勘明仁和錢塘會稽蕭山桐廬分水六縣仁和浦東橫浦三場嚴州一所不致成災一疏稱被災之新昌等縣衛及歉收之仁和等縣場所業

奉

恩綸分別撫恤口糧賞給籽本災民已邀逾格

殊恩足資接濟所有前請借籽種口糧之處應毋庸置議仍多
留米穀以備將來減價糶濟至賞給口糧籽本現飭各該
府縣衛場所體察民情妥協查辦先于各該縣常平倉米
穀項下按數動給仍于秋成後動支司庫收存地丁飭發
領買還倉如有不願領本色穀米者照例籽本每穀一石
折給銀六錢撫卹口糧每米一石折給銀一兩二錢于司
庫收存三十年地丁鹽道庫京協餉餘平銀內動支給發
統俟給竣日起照例扣限取造賑過細戶冊結同實用薪

水飯食船價運脚等項經費欸冊另詳題銷等語查乾隆三十一年正月初四日內閣奉

上諭浙江天台寧海新昌等三縣去秋晚禾間有被旱業經該撫酌給籽本其應徵錢糧照例蠲緩並預籌撥運倉穀協濟小民自可不致失所但念東作方興春收尙遠青黃不接之際閭閻生計未免稍艱着加恩將天台新昌寧海等縣查明實在貧乏戶口散給一月口糧以資接濟至仁和錢塘會稽蕭山桐廬分水等縣雖據該撫勘明係一隅偏災亦經分別緩徵而收成究屬歉薄民力不無拮据並着加恩將此數縣歉收地畝于春耕時按畝賞給籽本穀三升免其追繳令各

乘時力作該撫其董飭所屬悉心經理務俾小民均沾實惠
以副朕愛養黎元至意該部遵諭速行欽此經臣部行文浙
江巡撫欽遵辦理在案今該撫既稱現飭各該府縣衛場
所體察民情妥協查辦應令俟給竣之日分別本折并同
用過官役薪水飯食等項銀兩一并取造冊結據實題報
核銷至該撫疏稱前經題請借給籽種口糧應請毋庸置
議仍多留米穀以備將來減價糶濟等語應如該撫所題
辦理仍令俟事竣之日亦卽分晰造報查核可也奉

旨依議

乾隆三十五年正月欽奉

上諭上年浙省杭州湖州二府所屬近水八州縣因夏雨稍多
低田間被淹浸業經散給籽種蠲免錢糧并于正月內給賑
一月俾口食咸得寬裕第現在東作方興距麥秋爲期尙遠
閭閻生計仍恐不免拮据所有仁和錢塘烏程歸安安吉長
興德清武康八州縣并坐落烏程等州縣之嘉湖衛坐落仁
和等縣之杭嚴衛各被災極貧戶口着再加恩加賑一月令
農人得盡力春耕不致少有失所該撫其督率所屬實心查
辦毋使胥吏稍有扣剋浮冒務俾農民均沾實惠該部卽遵
諭行欽此

乾隆三十五年賑濟仁和縣極貧災民二千八百六十一

戶男婦大口三千二百七十四口小口一千八口計賑一月共折給銀六百五十七兩三錢七分二厘

賑濟仁和場極貧竈丁三千八百九十六戶男婦大口六千一百四十三口小口一千一十八口計賑一月共折給銀一千一百五十七兩四錢四分八厘

賑濟海寧州極貧災民一千四百七十戶男婦大口二千四百三十一口小口八百九十八口計賑一月共折給銀五百一兩一錢二分

乾隆三十六年正月初四日欽奉

上諭上年浙江濱海州縣猝遇風潮間有被災處所業經飭令

該撫加意撫恤分別議賑至被災五分六分之處雖例不加賑但當青黃不接之時貧民口食未免拮据着加恩將海寧縣之南沙公地仁和安吉長興三州縣仁和一場查明被災極貧除例給籽本外于本年三月內加賑一月口糧俾資耕作其勘不成災之各縣場歉收田地貧民有願借倉穀籽本者並酌量借給于秋成免息還倉該撫其董率各屬實心經理務使均沾愷澤以副朕軫念窮黎至意該部遵諭速行欽此

乾隆四十四年二月准戶部咨覆閩浙總督楊景素等奏稱爲會籌調濟以裕浙西民食事竊照浙西杭嘉湖三府

地窄人稠歲產米糧應交漕米一百數十萬石所餘不敷民食之半恒藉外販接濟本年聞江西湖廣產米省分間有被災本地價值未平而隣省江蘇亦非豐獲每遇客米到彼卽在江蘇得價售賣轉運到浙省甚屬寥寥故現在雖值晚稻豐登而浙西糧價未見平減一至來歲青黃不接誠恐價值日昂于民食不無關碍臣等伏思我

皇上加惠黎元至周極渥凡有可以通融調劑無不仰蒙

恩允

臣

楊景素在浙與

臣

王直望會查乾隆二十四年間因杭

嘉湖三府晚稻歉收經前督臣楊廷璋等奏請酌撥閩省臺灣倉穀十萬石招令浙商自備資本由海買運回浙糶

布政司
卷五十一
三

賣但時值北風盛發臺穀難以運浙先于內地福州興化
泉州福寧四府近港各屬倉內通融買運仍令臺灣府按
數撥運內地補倉欽奉

硃批俞允在案今浙江杭嘉湖三府既因外販罕至應需調劑
而浙東八府雖屬豐收亦難撥運接濟惟閩省臺灣向稱
產米之鄉現在倉貯充裕且海道可通輓輸甚易則援前
例酌撥臺穀招商買運洵足以廣

皇仁而資裒益但現在亦值北風盛發臺穀遠難運至浙西

臣

楊景素與

臣

黃檢往返札商亦請先于內地福州府屬倉

內撥穀三萬五千石興化府屬撥穀一萬五千石泉州府

屬撥穀三萬五千石福寧府屬撥穀一萬五千石共十萬石臣王宜望曉諭杭嘉湖三屬殷實商民自赴閩省官倉陸續買糴運至乍浦聽其在杭嘉湖一帶自行糴賣仍飭臺灣府于府倉現貯穀二十二萬餘石之內俟南風汎起按內地各屬撥出各數運還補倉其浙商買穀價值查乾隆二十四年係照臺地買補每石六錢之價酌加水脚銀一錢六分共銀七錢六分但今渡臺船價與人工飯食無不視昔增價前定價值不敷買運並請每石酌加水脚三分共定爲七錢九分飭令浙商就近收貯浙省地方官按照收銀數目填給連二印照註明應買某縣倉穀若干交

該商赴閩領運閩省地方官驗明分截一紙將穀發給餘
照一紙仍給該商俟運穀回浙繳驗查銷其運穀應需船
隻水脚等費亦聽該商自備毋庸動款開銷仍飭沿海文
武員弁嚴行稽查如有船照穀數不符立即稟報查究倘
該員弁等稽查不力致有透漏夾帶並指勒各商者均卽
嚴行叅處至浙省兌收穀價委員彙解閩省轉發臺灣府
于來歲早晚二收採買還倉似此通融哀益庶浙西三府
來歲青黃不接可免食貴之虞而于臺灣穀多價平之區
亦毫無妨礙除已分飭辦理外臣等預籌調劑浙西民食
起見今合詞恭摺具

奏伏乞

皇上睿鑒訓示謹

奏乾隆四十三年十二月二十五日奉

硃批知道了欽此

歷代

唐 大歷十一年春三月蕭昕奉詔來杭宣慰賑給

冊府元龜

太和六年夏杭州災疫詔賜米二萬石賑杭州八縣

萬歷舊志

大順二年八月奉詔免逋負

唐書昭宗本記

宋 太平興國七年二月詔除逋稅

宋史太宗本記

咸平二年杭州奉詔免中等戶今歲丁身錢

宋史真宗本紀

治平元年杭州水遣使行視疏治賑恤獨其賦租

宋史英宗本紀

錄載救災狀奏浙西災傷第一狀臣聞事豫則立不豫則廢此古今不刊之語也至于救災恤患尤當在早若災傷之民救之于未饑則用物約而所及廣不過寬減上供羅賁常平官無大失而人人受賜今歲之事是也若救之于已饑則用物博而所及微至于耗散省倉虧損課利官為一困而已饑之民終于死亡熙寧之事是也熙寧之災傷本緣天旱米貴而沈起張觀之流不先事奏聞但務立賞閉糶富民皆爭藏穀小民無所得食流殍既作然後朝廷知之始勅運江西及數本路上供米一百二十三萬石濟之巡門俵米攔街散粥終不能救饑饉既成繼之以疾疫本路死者五十餘萬人城郭蕭條田野邱墟兩稅課利皆失其舊勘會熙寧八年本路放稅米一百三十萬石酒課虧減六十七萬餘貫畧計所失共計三百二十餘萬貫石其餘耗散不可悉數至今轉運司貧乏不能舉手此無他不先事處置之過也去年浙西數郡先水後旱災傷不減熙寧然二聖仁智聰明于去年十一月首發德音撥發本路上供斛計二十萬石賑濟又于十二月中寬減轉運司元祐四年上供額斛三分之一為米五十餘萬斛

用其錢買銀絹上供了無一毫虧損縣官而命下之日所
在歎呼官既住糶米價自落又自正月開倉糶常平米仍
免數路稅務所收五穀力勝錢且賜度牒三百道以助賑
濟本路帖然遂無一人餓殍者此無他先事處置之力也
由此觀之專豫則立不豫則廢其禍福相絕如此恭惟二
聖天地父母之心見民疾苦旬旬救之本不計較費用多
少而臣愚魯無識但知權利害之輕重計得喪之大小以
謂譬如庶民之家置庄田招佃客本望租課非行仁義然
猶至水旱之歲必須放免欠負借貸糧者其心誠恐客
散而田荒後日之失必倍于今故也而况有天下子萬姓
而不計其後乎臣自去歲以來區區獻言屢實天聽者實
恐陛下客散而田荒也去歲杭州米價每斛至八九十自
今歲正月以來日漸減落至五六月間浙西數郡大雨不
止太湖泛溢所在害稼六月初間米價復長至七月初
及百錢足距見今新米已出而常平官米不敢住糶災傷
之勢恐甚于去年何者去年之災如人初病今歲之災如
病再發病狀雖同氣力衰耗恐難支持又緣春夏之交雨
水調勻浙人喜于豐歲家家典賣舉債出息以事田作車
水築圩高下殆通計本已重指日待熟而濞雨風濤一舉
害之民之窮苦實倍去歲近者將官劉季孫在蘇州按敵

臣密令季孫公路體訪而季孫還爲臣言此數州不獨滯
雨爲害又多大風駕起潮浪堤堰率皆被損湖州水入城
中民家者尺餘此去歲所無有也而轉運判官張璠自常
潤還所言略同云親見吳江平望八尺聞有舉家田苗沒
在深水底父子聚哭以船棹撈攜云半米猶堪炒喫青稈
且以喂牛正使自今雨止已非豐歲而况不止又未可
知則來歲之憂非復今年之比矣何以言之去年杭州管
常平米二十三萬石今年已糶米十五萬石雖餘八萬石
而糶賣未已又緣去年災傷放稅及和糶不行省倉闕數
所有上件常平米八萬石只了兌撥充軍糧更無見在惟
有糶常平米錢近八萬貫而錢非救飢之物若來年米益
貴錢益賤雖積錢如山終無所用熙寧中兩浙市易出錢
百萬緡民無貧富皆得取用而米不可得故曳糶執帶金
玉橫尸道上者不可勝計今來浙東西大抵皆糶過常平
米見在絕數少熙寧之憂寡寡在人眼中矣臣材力短淺
加之衰病而一路生齒憂責在臣受恩既深不敢別乞開
郡日夜思慮求來年救饑之術別無長策惟有秋冬之間
不惜高價多糶常平米以備來年出糶今來浙西數州米
既不熟而轉運司又管上供年額斛一百五十餘萬石若
兩司爭糶米又大貴饑饉愈速和糶不行來年青黃不交

之際常平有錢無米官吏拱手坐視人死而山海之間接連騷閭盜賊結集或生意外之患則誅極臣等何補于敗以此須至具實奏聞伏望聖慈備錄臣奏行下戶部及本路轉運提刑兩路鈐轄司疾早相度來年合與不合准備常平斛斛出糶救饑如合准備卽具逐州合用數目臣已約度杭州合用二十萬石仍委逐司擘畫合如何措置令米價不至大段翔湧收糶得足如逐司以謂不須準備出糶救濟卽令各具保明來年委得不至飢殍流亡結罪聞奏緣今來已是入秋去和糶月日無幾比及相度往復取旨深慮不及于事伏乞詳察速賜指揮臣屢犯天威無任戰慄待罪之至謹錄奏聞伏候勅旨 奏乞浙西接續糶米救飢狀臣伏見浙西諸郡二年災傷而今歲水災蘇湖常三郡水通爲一農民棲于邱墓舟楫行于市井父老皆言耳目未曾聞見流殍之勢甚于熙寧臣聞熙寧中杭州死者五十餘萬蘇州三十餘萬未數他郡今旣秋田不種正使來歲豐稔亦須七月方見新穀其間饑饉變故未易度量吳人雖號柔弱不爲大盜而宜欵之民勇悍者多以販鹽爲業百十爲羣往來浙中以兵杖護送私鹽官司以其不爲他盜故畧而不問今人旣無食不暇販鹽則此等失業聚而爲寇或得豪猾爲之首帥則非復巡檢縣尉所

能辦也恭惟二聖視民如子苟有可救無所吝惜凡守臣
監司所乞一一應副可謂仁聖勤恤之至矣然臣在浙中
二年親行荒政只出糶常平米一事更不施行餘策而
米價不湧卒免流殍蓋緣官物有限饑民無窮若兼行借
貸俵散則力必不及中路關絕大誤饑民不免拱手而視
億萬之死也不如併力一意專務糶米若糶不絕則市價
平和人人受賜縱有貧民無錢可糶不免流殍蓋亦有限
量矣臣昨日得杭州鹽稅蘇監書報臣云杭州日糶三千
石過七月無米可糶人情洶洶朝不謀夕但官場一旦米
盡則市價倍湧死者不可勝數變故之生恐不可復以常
理度矣欲乞聖慈速降指揮令兩浙運司限一兩日內約
度浙西諸郡合糶米斛酌中數目直至來年七月終除見
在外合用若干石入急遞奏聞候到卽指揮發運司官吏
于轄下諸路封樁及年計上供錢斛內擘畫應副須管接
續起發赴浙西諸郡糶賣不管少有關絕仍只依地頭原
價及量添水腳錢出賣及賣到水腳錢並用收買金銀還
充上供及封樁錢物所貴錢貨流通不致饑荒所有借貸
俵散之類候出糶有餘方得施行似此計畫雖是數目浩
瀚然止于糶賣不失官本似易應副但令浙西官場糶米
不絕直至來年七月終則雖天災流行亦不能盡害陛下

赤子也如蒙施行卽先降手詔令監司出榜曉諭軍民令
一路曉然知朝廷已有指揮令發運司將上供封椿斛斗
應副浙西諸郡糶米直至明年七月終不惟安慰人心破
奸雄之謀亦使蓄積之家知不久官米卽至自然趁時出
賣所濟不少惟望聖明憫一方危急早賜施行相度準
備賑濟第一狀元祐五年九月七日龍圖閣學士左朝奉
郎知杭州蘇軾狀奏准尙書戶部符准勅知杭州兩浙西
路兵馬鈐轄蘇軾奏勘會今年五六月浙西數郡大雨不
止太湖泛溢所在害稼災傷之勢恐甚于去年伏望下戶
部及本路轉運提刑兩路鈐轄司相度來年合如何準備
救濟奉聖旨依奏都省批內相度限半月本司今相度到
準備救濟事件如左一本司勘會去年八九月間杭州
在市米價每斛六十足至十一月足長至九十五足其勢
方湧貴間因朝旨寬減轉運司上供額斛三分之一卽時
米價減落及本州正月內便行出糶常平米至七月終共
糶一十八萬餘石以此米價無由增長人免流弊今來在
市米見今是七十五文足至冬間轉運司收糶上供額斛
及檢放秋稅軍糧恐有缺少亦須和糶取足又本州須糶
常平米二十餘萬石諸州亦各收買似此爭糶必須湧貴
縱使大破官錢收糶得足亦恐來年關食小民必不辨高

價收買官米至時若米貴人饑本司必須奏乞減價出賣竊料仁聖在上必不忍坐視人飢不許減價約度浙西諸郡今年必須和糶常平米五十餘萬石準備來年出糶若價高本重至時每斛只減十文亦須坐失五萬餘貫而况饑饉已成流殍不已則朝廷所以救恤之者其費豈止五萬貫而已哉欲乞聖慈特許寬減轉運司今來上供額斛一半仍依去年例令折價錢置場收買金銀絀絹上供則朝廷無所耗失而浙中米價稍平常平收糶得足來年不至大段減價出賣耗折常平本錢一路之人得免流殍爲惠不少勘會去年本司亦乞寬減上供額斛一半准勅只許寬減三分之一今來災傷及檢放秋稅次第皆甚于去年又緣連年災傷民力愈耗合倍加存卹所以須奏乞寬減一半伏望聖慈憐愍一方特依所乞盡數寬減一勘會熙寧八年兩浙饑饉朝旨截撥江西及本路上供斛斛一百二十五萬石賜本路賑濟只緣本路奏乞後時不及于事卒死五十萬人去歲十一月二十九日聖旨令發運司撥上供斛斛二十萬石賜本路減價出糶所費只及熙寧六分之一然及時濟用倉廩有備米不騰湧人免流殍本司今來勘會蘇湖常秀等州頻年災傷人戶被困已倍去歲檢放苗米亦必加倍不惟人戶闕食亦恐軍糧不足

欲乞檢會去年體例更賜加數特與截撥本路或發運司
上供斛計三十萬石令本路減價出糶或用補軍糧之關
伏望聖慈愍念一路軍民特與盡數應副右議狀如前
本司已具上項事件關牒本路轉運提刑司照會相度施
行夫訖深慮轉運司官吏職在供餽所有寬減額斛難于
自言伏望聖明以一方生靈爲心非爲苟寬官吏之責特
賜過慮及早施行又况所乞數目雖廣如所耗損錢數不
多若待饑饉已成然後垂救則所費十倍無及于事伏乞
決自聖意指揮三省更不下有司往復勘當施行謹錄奏
聞伏候勅旨相度準備賑濟第二狀元祐五年九月十
七日龍圖閣學士左朝奉郎知杭州蘇軾狀奏近准朝旨
令本司及轉運司提刑司相度準備來年被災餓食人戶
本司已具二事聞奏乞寬減轉運司上供額斛一半截撥
上供米三十萬石準備及補軍糧之闕未蒙回降指揮本
司再相度來年準備大計全在廣糶常平斛計于正月以
後便行出糶平準在市管價以免流殍之災此外更無長
策今來選差官吏開倉和糶優估米價戒約專斛不得乞
覓非不嚴切然經今一月並無一人赴倉入中體問得蓋
是蘇湖常秀大段災傷兼自八月半間至今陰雨不止災
傷之餘所收無幾又少遇晴乾已熟者不得刈已刈者不

得春有穀無米日就腐壞見今訪聞蘇秀州在市米價已
是九十五文足添長之勢炎炎未已本司欲便令杭州添
價收糶不惟助長米價爲小民目下之患又官本既貴來
年難爲出糶若不添錢又恐終是收糶不行來年春夏間
缺米出糶必有流弊之憂竊料至時難以諱言災傷官吏
亦須畧具事實聞奏仁聖在上理無不救必須多方于鄰
路譬畫斛斛賑濟若不預爲之防則恐鄰路無備臨時擘
畫不行須至先事奏乞者右本司勘會去歲朝旨寬減轉
運司上供額斛三分之一却令將折斛錢買銀絹上供又
今年本司亦奏乞寬減額斛一半如蒙施行卽轉運司折
斛錢萬數不少又勘會提刑司今年諸州糶常平米至多
所管常平司官錢萬數不少但有錢無米坐視餓殍爲憂
不細欲乞聖慈過爲防慮特勅發運司相度擘畫錢本于
江淮近便豐熟州軍差官置場和糶白米五十萬石嚴賜
指揮須管數足仍搬運至真揚州椿管若今來春本路關
常平米出糶卽令發運司撥發于逐州下卽仍以本路常
平錢充還若至時本路常平米有備不須搬運上件米出
糶卽就撥充本路轉運司上供額斛却以寬減折斛錢充
還如此卽于朝省錢物無所耗損而于本路生靈億萬性
命稍免溝壑之憂謹錄奏聞伏候勅旨 相度準備賑濟

第三狀元祐五年十月二十一日龍圖閣學士左奉
知杭州蘇軾狀奏右臣近奉朝旨相度準備來年賑濟
食人戶等具畫一事件聞奏內多糴常平以備來年出糶
平準市價一事最爲要切見今浙西諸郡米價難賁然亦
不過七十足糶度來年青黃不交之際米價必無一百以
下至時若依元價出糶猶可以平壓翔湧之患終勝于官
無斛斛坐視流殍而提刑司專務新惜兩三錢遍行文字
戒勸官估臣已指揮杭州不得減價依舊作七十收糶見
今亦不過糶得三萬餘石其餘諸郡不敢有違訪聞蘇秀
最係出米地分見今不過糶得二三萬石而湖州一處災
傷爲甚提刑司已指麾本州住糶却令蘇州撥常平米五
萬石與湖州又令秀州撥十五萬石與杭州若湖得五萬石
猶恐未足于用而蘇秀撥十五萬石深慮逐州不免妨闕
若新糶不多卽是兩頭闕事而搬運水脚兵稍有偷盜耗
失之費亦與所減兩三錢不爭若使來年官米數少不能
平壓市價致有流殍更煩朝廷截撥斛對散與饑民則爲
十倍之費是所減毫毛而所捐邱山大爲非策訪聞諸郡
富民皆知來年必是米貴各欲廣行收糶以規厚利若官
估稍優則農民米貨盡歸于官此等無由乘時射利吞併
貧弱故造作言語以搖官吏皆言多破官錢深爲可惜若

便爲減價住糶正墮其計况今來已是十月下旬不過更
一二十日卽無收糶糶却添價亦不及事恐有誤來年出
糶大事所以須至別作擘畫仰祈朝廷緣臣先于九月十
七日曾奏乞下發運司于豐熟近便州軍和糶五十萬石
以備常平米不足般取出糶却以本路常平錢還發運司
若常平米足用卽充本路轉運司上供米仍以額斛錢撥
還兼勘會淮南大熟揚州高郵軍米價甚平若行此策顯
無妨害伏望聖慈檢會前奏速賜施行與此一方連年被
災之民廣作準備謹錄奏聞伏候勅旨 相度準備賑濟
第四狀元祐五年十一月二十一日龍圖閣學士左朝奉
郎知杭州蘇軾狀奏右臣勘會今年本路風水之災倍于
去年本司累具合行救濟事件聞奏伏料仁聖在上必已
矜察見今蘇湖杭秀等州米價日長杭州所糶租米以備
出糶每斛不下六十至七十足錢猶自收糶不行恐須至
更添錢招買方稱足用竊計開春米價必是翔湧若依條
不虧元價出糶則官本已重小民艱于收糶無以救濟貧
民平準市價若奏乞減價出糶又恐耗失常平官本亦非
長策須至奏聞又勘會杭州裏外見管義倉米四萬餘石
準條災傷之年並許俵散賑濟本州相度若待饑饉已成
方將上件義倉盡行俵散亦未能盡濟饑民惟是開春已

後纔見在市米價增長卽便將義倉常平米賤價出糶但市價不長則一郡之民人人受賜今來起請欲乞將常平米除係三年以上依條合減價外其餘並每野減五文足內係今年貴價收糶者每野減二十文足出糶仍將義倉米隨色額估定賤價一處出糶所收錢並用填還常平所虧官本錢如填還足外尙有剩數亦許發填本路別州常平米所虧官本錢仍下浙西諸郡依此體制施行所貴本路明年饑民普得賤米喫用全活億萬性命其利至博而其實止于耗却義倉元不破官本米貨十餘萬石况自有條災傷之歲許將義倉米俵散但俵散之所及者狹不出糶之利所及者廣伏望聖慈特出宸斷早賜施行謹錄奏聞伏候勅旨 應詔論四事狀元祐五年六月初九日龍圖閣學士左朝奉郎知杭州蘇軾狀奏臣近者伏觀邸報以諸路旱災內出手詔兩道其畧曰豈政治失當事之害物者尙多上下厄塞情之不通者非一刑或不稱其罪用或不當其人又曰意者政令寬弛吏或爲害而莫知賦役失當民病于事而莫察忠言有壅而未達賢材有抑而未用臣伏讀至此感憤涕泣而言曰嗚呼陛下卽位改元于今五年三出此言矣雖禹湯之聖不惜罪已而臣子之心誠不忍聞思有以少補聖政助成應天之實使堯舜之

仁名言皆行心迹相應庶幾天人感通災沴不作免使君
父數出此言不勝拳拳孤忠而志慮短淺又以出守外服
不能盡知朝政得失獨以目所親見民之疾苦州縣官吏
日夜奉行殘傷其饑體散離其父子破壞其生業爲國歛
怨而了無絲毫上助國用者四事味死獻言謹具條件如
左一伏見元祐四年八月十九日勅節文應見欠市易
人戶籍納拘收產業自來所收課利及估賣到諸般物色
錢已及官本別無失陷除已有人承買交業外並特給還
未足者許貼納收贖仍不限年四方間之莫不鼓舞歌咏
以謂聖恩深厚獨知民隱誠三王推本人情之政也尋契
勘杭州共有一百一十二戶合該上項勅條方且次第施
行次忽准尚書戶部符據蘇州申明如何謂之折納如何
謂之藉納本部已依條估覆供認伏定入官折還欠錢謂
之折納已經估覆三估不伏定卽以所估高價藉定者謂
之籍納惟籍納產業方許給還用此契勘遂無一戶可以
應得指揮至有已給再追者于是百姓謹然出訴于庭以
謂某等自失業以來父母妻子離散轉在溝壑久無所歸
伏幸仁聖在上昭恤如此命下之初如蒙更生今者有司
泐文生意又復壅隔雖有惠澤蓋與無同臣卽看詳元初
立法本爲興置市易已來凡異時民間生財自養之道一

切收之公上小民既無他業不免與官中首尾膠固以至
供通物產召保立限增價出息除貸轉變以苟趨目前之
急及至限滿不能填償又理一重息計歲月益久逾欠愈
多科決監錮以逮妻孥市易官吏方且計較功償巧爲文
詞致許人戶願以屋業及田土折納還官各以差官檢估
取伏定文狀了日理作季限放免息罰召人添價收買方
人戶在係彙之時州縣督責嚴急如有產業田土豈復自
能爲主檢估伏認勢須在官雖名情願實只空文惟是頑
狡之人或能抵拒以至三估未肯供狀及其既納皆是折
還欠錢並籍在官有何不同聖恩寬大特爲立法以救前
日之弊所稱籍納只是臨時立文出于偶爾而有司執閱
妄意分別若果如申明卽是善良畏事之人不象優恤元
初恃頑狡猶與官爲競之民却被惠澤事理如此豈不倒
置不惟元條無此明文實恐非朝廷緩養窮困之意及檢
會元祐四年三月二十六日勅人戶欠市易官錢將樓店
屋業折納在官並將所收房課充折別無少欠亦許給還
亦不會分別折納籍納以此推攻顯無可疑自是蘇州官
吏巧薄以刻爲忠曲有申明而戶部吝于出納以害仁政
伏乞特加詳察不以折納籍納並依元條施行所貴失業
之人均被聖恩 一伏見元祐元年九月八日勅尙書戶

部狀提點兩浙刑獄公事喬執中奏熙寧四年以後至元豐三年以前新法積欠鹽錢及有均攤等人陪填見今貧乏無可送納已累經赦恩比類市易等錢只今送納產鹽場監官本價錢其餘並乞除放等事本部勘當欲並依喬執中所奏前項事理施行仍連狀奉聖旨依及準提刑司備坐元奏積欠鹽錢前後官司催納僅及六年催到貫萬不少今來所欠並是下等貧困之人無可送納已累經赦恩及逐節事理遂具狀申奏今准省符前項指揮請詳朝旨施行本州契勘上件年分計有四百四十五戶自承朝旨已來迨今首尾五年纔放得二十三戶臣竊怪之以謂東南鹽法久爲民患原其造端蓋自兩浙流行散漫遂及江南福建流弊之末人不堪命故詔令之下如救水火今者五年之久民之疾苦依然尙在朝廷德澤十不行一何也推考其故蓋提舉鹽事司執文害意謂非貧乏不在此數而州縣吏人因緣爲姦以市賄賂故久而不決竊詳元奏之意本謂積欠歲久前後官司催納到貫萬不少今來所欠並是貧困之人旣以累經赦恩比類市易只乞與納官本價錢本部勘當以此並乞依奏仍連狀奉聖旨施行卽是執中所奏欠戶自是貧困之人皆當釋放矣省部行下務從文省止是節畧元奏爲其已涉六年見今貧乏

無可送納非爲更行勘會須得委是貧乏方可施行至元祐二年本州再以元豐四年已後至八年登極大赦以前積欠贖戶奏乞除放省部看詳方始立文如委是貧乏卽依元祐元年九月十八日已降朝旨施行以顯執中當時所奏並謂見今貧乏無可送納合行一例除放及節次本州與轉運司各會申明省符與元奏詞語不同省部亦已開析緣元係連狀並依前項所奏施行事理甚明而主事堅執至今疑惑至使州縣吏人戶戶行遣一一較量計構官司買囑隣里尙復多方指搆以肆規求待其充欲然後保明遂致其間一百四十九戶已放而復行勘會一百六十五戶申省見勘會而未聞二十五戶已圓而申稟監司及有一戶二戶旋申省部如此反復多方留難卽五年之久未足爲怪也伏惟仁聖在上憂民疾苦寤寐不忘惠澤之下宜如置郵傳命今乃中道廢格以開奸吏乞取之路反使朝廷之恩獨與奪于州縣庸人之手省部旣不鈞察官吏亦恬不爲慮其非所以仰稱仁聖焦勞愛民之意也伏乞昭示德音申飭有司更不勘會是與不是貧乏無俾奸吏執文害意以壅隔朝廷大惠不然或斷以第三等以下並依上件朝旨施行則法令易簡一言自足矣蓋等第素定貧富較然朝行夕止奸吏無所措意也所有元豐四

年以後及至八年大赦以前所欠鹽戶亦乞依此施行
 貼黃契勘熙寧四年以後止元豐八年登極大赦以前人
 戶積欠共計五萬三百餘貫若謂非貧乏有可送納即自
 元祐元年至今並不曾納到分文顯見有司空留帳籍虛
 數以害朝廷實惠一伏見熙寧中天下以新法從事凡
 利源所在皆歸之常平使者而轉運司歲入之計惟田賦
 與酒稅而已方是時民財窘亟酒稅例皆減耗諸路既已
 經費不足上下督責益急故酒務官吏至有與庸保雜作
 州縣受官視事去處亦或爲小民誼譁羣飲之肆又不能
 售往往苟逃罪戾巧爲文致誘導無知之民以陷欠負破
 蕩之禍如許人供通自己或借他人產業當酒是也臣近
 契勘杭州自承上件指揮以來以產當酒者計一千四百
 三十三戶計錢一十四萬二千九百餘貫前後官吏催督
 監銅繼以鞭笞拘當在官使之雜業又自收其租利中間
 以至係累犴獄公與私皆擾人與產俱亡十餘年間除已
 催到一十二萬九千四百餘貫計千二十九戶外尚有餘
 欠一萬三千四百餘貫計四百四十九戶歲月既久終不能填
 償豈非並是困窮無有之人乎尋檢會元豐四年五月二
 十一日勅令酒務留當產業依鹽錢例拘收以其鹽與酒
 事同體一故也今者鹽錢欠戶已在元祐元年九月十六

日及二年九月十八日朝旨許納場監地頭官本買錢餘
重除放獨酒欠至今未蒙如此施行豈容事同體一拘收
則同而除放則異此無他蓋有司不能推廣朝廷德意故
也臣愚欲乞將元豐八年登極大赦以前酒欠人戶並依
所欠鹽錢已得朝旨并今來前項申明更不勘會貧乏或
斷自第三等以下事理施行不惟海隅細民並蒙休澤實
亦無偏無黨皇極之道也一伏見元豐四年杭州合發
和買絹二十三萬一千疋准朝旨撥轉運司錢于餘杭等
縣委官置場一十一處收買尋以數內揀下不堪上供五
萬七千八百九十疋計錢五萬五千餘貫却勒逐場變轉
是時錢重物輕一日併出既聲言行濫不受于官又須元
價以冀償足捐之市中莫有顧者于是官吏惶駭莫知所
爲不免一切除貸及假借官勢抑配在民往往其間浮浪
小人與無賴子弟詭冒姓名朋欺上下元買官吏苟得虛
數還之有司以緩目前之禍其後督責嚴急必于取償奏
立近期專委強吏十餘年間如捕寇盜除催到四萬六千
餘貫外餘欠八千二百餘貫共二百八十二戶並是貧民
下戶無所從出與詭冒逃移不知頭主及干係均納之人
連延至今終不能足惟有簿書以資奸吏追擾遺害未已
今者伏准元祐五年四月初九日勅諸處見欠鹽鹽和預

買青苗錢物元是冒名無可催理或全家逃移隣里抱認或元無頭主均及干繫人以此積年未能了絕雖係元請官本况內有已該元豐八年登極大赦者依聖旨並特除放歡聲播傳和氣充塞臣于此時仰知聖德廣大正使堯湯雨旱亦不足慮也然政有體事有數體雖備而數不能悉言雖不及而意在是者蓋非俗吏所能知也臣輒不避僭妄竊詳和買之法以錢與民而收絹是猶補助耕斂之意公私兩有之利也元豐官吏以絹與民而收錢又皆行濫棄捐之餘取償倍稱不實之直除貸抑配以苟免一時失陷之責卽是利專自爲害專在民也事理人情輕重可見聖恩矜恤宜在所先臣愚以謂元豐四年退賣物帛既同是和買之名又有非法病民之實自合依今年四月九日朝旨施行外伏望朝廷深念前項弊害止是出于一時官吏私意非如蠶鹹和預買青苗天下公共之法更賜加察告示矜寬不以有無頭主是與不是冒名及隣里抱認與均及干繫人並特與除放是亦稱物平施天之道也右所有四事伏望聖慈特察臣孤忠志在愛君別無情弊更賜清問左右大臣如無異論便乞出勅施行若後稍有

一事一件不如所言臣甘伏罔上誤朝之罪若復行下有司反復勘會必是巧爲馭難無由施行臣緣此得罪萬死

無悔但恨仁聖之心本不如此天降甘雨爲物所隔終不到地可爲痛惜而况前件四事錢物數目雖多皆是空文必難催索徒使胥吏小人緣而爲奸威福平民故臣敢謂放之則損虛名而收實惠不放則存虛數而受實禍利害較然伏望聖明特出宸斷天下幸甚臣愚忝少慮言語粗疎干犯天威伏俟斧鑕謹錄奏聞伏候勅旨 貼黃臣伏見四方百姓皆知二聖恤民之心無異父母但臣子不能推行致澤不下流日近以蘇州官吏妄有申明折納籍納一事戶部從而立法致已給還產業却行追收人戶詣臣哀訴皆云黃紙放了白紙却收有泣下者臣竊深悲之自二聖嗣位已來恩貸指揮多被有司巧爲艱闕故四方皆有黃紙放而白紙收之語雖民知其實止怨有司然陛下亦未嘗峻發德音戒勅大臣令盡理推行則亦非獨有司之過也况臣所論四事錢物雖多皆是虛數必難催理除是復用小人如吳居厚盧秉之類假以事權濟其威虐則五七年間或能索及三五分若官吏只循常法何緣索得三五年後人戶竭產伍保散亡勢窮理盡不得不放當此之時亦不謂之聖恩矣伏見坤成節在近天下臣子皆以放生爲忠度僧爲福臣愚無知不識大體輒敢以此四事爲獻伏望留神省覽指揮執政便與施行導迎天休以益

聖筭其賢于放生度僧亦遠矣若陛下不少留神執政只作常程文字行下一落胥吏庸人之手則茫然如墮海中民復何望矣臣言狂意切必遭衆怒伏乞聖慈只行出前奏狀留此貼黃一紙更不降出以全孤危庶使愚臣今後每有所聞得盡論列以報二聖知遇之恩萬分之一也臣不勝大願乞檢會應詔所論四事行下狀元祐五年九月二十七日龍圖閣學士左朝奉郎知杭州蘇軾狀奏右臣今年六月九日輒具朝廷至仁寬貸宿逋已行之命爲有司所格沮使王澤不得下流者四事其一曰見欠市易籍納產業聖恩並許給還或貼納收贖而有司妄出新意創爲籍納折納之法使十有八九不該給贖其二曰積欠鹽錢聖恩已許只納產場鹽監官本價錢其餘並與除放而提舉鹽事司執文害意謂非貧乏不在此數其三曰登極大赦以前人戶以產當酒見欠者亦合依鹽當錢法只納官本其四曰元豐四年杭州揀下不堪上供和買絹五萬七千八百九十疋並抑勒配賣與民不住鞭笞催納至今尙欠八千二百餘貫並合依今年四月九日聖旨除放然臣具此奏論經今一百八日不蒙回降指揮及檢會前奏四事早賜行下謹錄奏聞伏候勅旨尙書省取會到諸處稱不會承受到上件奏狀仍連元狀十二月十八日三

省同奉聖旨令蘇軾別具奏聞仍仰戶部指揮根究前奏
申尚書省繳進應詔所論四事狀元祐六年正月九日
龍圖閣學士左朝奉郎知杭州蘇軾狀奏右臣去年六月
具狀奏聞乞申明給還市易折納產業及除放積欠鹽錢
并人戶欠買退絹錢四事未蒙回降指揮今月五日准元
祐五年十二月十九日尚書省劄子會到諸處稱不曾承
受到上件奏狀十二月十八日三省同奉聖旨令臣別具
聞奏者今重具到元奏狀繳連在前謹錄奏聞伏候勅旨
貼黃臣竊見浙中州縣市井人煙比二十年不及四
五所在酒稅課利虧欠只如杭州酒務課利昔年三十餘
萬貫今來只及二十餘萬貫其他大率類此朝廷力行仁
政不爲不久而公私凋耗終不少蘇蓋是商賈物貨元未
通行故也民間買賣例少見錢惟籍所在有富實人戶可
倚信者賒買而去歲歲往來常買新貨却索舊錢以此行
商坐賈兩獲其利今浙中州縣所理利債大半係欠官錢
人戶官錢尙不能足私債更無由催以此商旅不行公私
受害若行此四事則官之所失止是虛數而人戶一蘇三
二年間商旅必復通行酒稅課利漸可復舊所補不小

紹興二年十二月臨安府火賑被火家八年正月減臨安

府夏稅折輸錢十三年七月蠲浙西貧民逋負丁鹽錢

宋史

高宗
本紀

淳熙元年十月再蠲臨安府民身丁錢三年六年十二月
蠲臨安府征稅一年七年三月再蠲臨安府民身丁錢八
年十一月蠲富陽新城錢塘夏稅已亥賑臨安府饑民庚
子再詔臨安府爲粥食饑民九年六月給臨安府貧民棺
瘞錢十年四月再蠲臨安府民丁身錢三年十三年十二
月賑臨安府城內外貧乏老疾之民

宋史孝
宗本紀

淳熙十六年閏五月蠲臨安第五等戶和買絹一年仍出
錢二十三萬緡賑臨安貧民紹熙元年正月再蠲臨安府

民身丁錢三年二年二月賑京城貧民三年四月蠲臨安
民元年二年逋賦四年正月蠲臨安府民身丁錢三年六
月蠲臨安增民稅錢八年戊午賑浙西旱傷貧民

宋史光
宗本紀

慶元元年正月以久雨賑給臨安貧民四月臨安疫出內
帑錢爲貧民醫藥棺斂費及賜諸軍疫死者家九月蠲臨
安府水災貧民賦二年二月再蠲臨安府民身丁錢三年
四年四月蠲臨安府租稅有差十二月再蠲臨安府民身
丁錢三年五年五月以久雨民多疫命臨安府賑恤之嘉
泰元年三月戊寅臨安大火四月辛巳詔有司賑恤甲申
丙降錢十六萬緡米六萬五十餘石賑被災死亡之家七

月復賑被火貧民十二月復免臨安府民身丁錢是歲浙西旱賑之仍蠲其賦四年二月蠲臨安府逋負酒稅三月丁卯臨安火庚午命臨安府賑焚室十二月再蠲臨安府民身丁錢三年開禧元年蠲臨安府逋負酒稅嘉定元年二月詔臨安府賑給流民二年三月庚申命浙西及沿江諸州給流民病者藥壬戌出內庫錢爲臨安貧民棺槨費六月命浙西諸州諭民種麻苴毋督其租命江西福建二廣豐稔諸州糴運以給臨安仍償其費三年四月戊辰出內庫二十三萬緡賜臨安軍民己巳詔臨安府給細民病死者棺槨是歲臨安府水賑之仍蠲其賦四年三月臨安

府賑給貧民死者賜棺錢七年十月出內帑錢賑臨安府
貧民八年三月以旱蠲臨安府茶鹽賞錢五月發米賑
臨安府貧民七月蠲臨安府貧民夏稅九年六月賑恤浙
西被水州縣寬其租稅十五年十二月發米賑給臨安府
貧民十七年二月命臨安府賑卹貧民

宋史寧
宗本紀

嘉定十七年十二月雪寒免京城官私房賃地門稅等錢
自是祥慶災異寒暑皆免寶慶元年二月發廩賑在京細
民四月賑在京細民二年十二月發廩賑賑在京細民紹
定三年十二月賑贍在京細民淳祐九年正月給官田五
百畝命臨安府創慈幼局收養道路遺棄初生嬰兒仍置

藥局療貧民疾病十二年八月詔以緡錢四十萬賑恤在京軍民寶祐元年十月詔出緡錢二百萬賑恤京城軍民二年六月罷臨安府臨平鎮稅場開慶元年二月發平糶倉米減直賑在京民十月詔給還浙西提舉常平司歲收上亭戶沙地租二百萬永勿復徵景定三年二月臨安屬

邑水民溺死者衆詔守臣給樁瘞之

宋史理宗本紀

咸淳元年正月詔臨安免征商四月丁未免徵臨安官私房儻地錢戊申再免在京征商三月發米贍京城民閏五月乙巳久雨京城減直糶米自是米價高卽發廩平糶以爲常丁未發錢贍在京小民丁巳以錢三十萬命臨安府

通變平物價八年十月以秋雨水溢詔減錢塘仁和兩縣

民租什二

宋史度
宗本紀

元至元十三年二月詔諭臨安新附府州司縣官吏凡
公私逋欠不得徵理所在山林河泊除巨木花果外餘物
權免徵稅二十四年十二月免浙西魚課聽民自漁是歲
浙西諸路水免今年田租十之二二十五年正月以杭州
連歲水賑其尤貧者四月尙書省臣言杭湖秀復大水請
輟上供米審其貧者賑之帝是其言二十八年二月遣行
省臺官發粟賑杭之臨安餘杭於潛昌化新城等縣饑民
三月杭州路饑發粟賑之仍弛湖泊蒲魚之禁四月弛杭

州西湖禽魚禁聽民網罟五月以杭州饑免今歲田租元史

世祖本紀

元貞二年四月杭州火賑之大德三年十一月杭州火發

粟賑之四年七月杭州路貧民乏食以糧萬石減其直糶

之六年六月杭州路饑以糧賑之七年六月浙西滂雨民

饑賑糧一月仍免今年夏稅并各戶酒醋課八年八月杭

州火發粟賑之

元史成宗本紀

大德十一年十一月杭州饑糧賑之正大元年閏十一月

以杭州路歲比饑僅今年酒課免十分之三

元史武宗本紀

延祐元年九月杭州水發廩減價賑糶

元史仁宗本紀

至治二年十二月杭州火賑之

元史英宗本紀

泰定元年五月杭州路屬縣水民饑賑糧有差二年十二月杭州饑賑糶有差四年六月發義倉賑鹽官州民

元史泰定

帝本紀

天歷元年十一月杭州火賑之至順元年二月杭州火賑糧一月閏七月杭州路水民饑詔賑之二年三月賑浙西鹽丁五千餘戶八月乙未杭州火賑被災民百九十戶

元史

文宗本紀

元統二年二月杭州水旱疾疫勅有司發義倉賑饑

元史順帝

本紀

明 洪武十年三月賑錢塘仁和餘杭民被水者戶米一

石

明實錄

永樂二年十二月以杭嘉湖水蠲今年租

明實錄

永樂三年八月命戶部覈實杭嘉湖等府被水災民悉免

今年田稅

續文獻通考

永樂十一年八月賑仁和縣饑十二年七月賑仁和縣饑

明實錄

永樂十二年十一月蠲蘇松嘉湖杭五郡水災田租四十

七萬九千七百餘石

嘉興府志

永樂二十二年十月於潛縣饑賑之

明實錄

洪熙元年十二月海寧流徙復業民奉詔免稅糧

舊志

宣德三年九月賑於潛縣饑十一月賑臨安新城二縣饑

月資錄

宣德四年仁和海寧以江患詔免田租

舊志

宣德六年十月賑於潛縣饑

明實錄

正統六年二月發官廩三十五萬杭州平糶

史概

正統十二年三月免杭州府去年被災稅糧

明實錄下同

景泰四年七月獨杭州府去年被災稅糧

景泰五年六月杭州府奉詔免去年稅糧

舊志

天順元年四月免杭州府屬縣去年無徵糧五年六月免

杭州府去年被災田糧

明實錄

天順五年九月杭嘉濱海諸縣潮大至賑恤之

舊志

成化六年四月以水災免仁和縣稅糧七年八月嘉湖杭
紹四府水蠲租賑濟貸以牛種十年十一月免杭州衛屯
田子粒以水旱故十三年正月以水免杭州府成化十二

年秋糧

明實錄

成化十四年三月杭州等府免糧三十三萬餘石

史概

宏治四年十一月以水免杭嘉湖三府屬并杭州二衛湖
州所夏稅秋糧有差十七年二月免杭州等五府及寧波
衛宏治十六年糧子粒有差

明實錄
下並同

正德十年十一月以水災免杭州府八縣夏稅有差十三年十一月以災免杭嘉湖州縣夏稅有差

嘉靖五年十月以早免杭州府稅糧有差八年十一月以杭州等府水災免存留稅糧有差仍令賑濟十二年正月以早免杭紹溫處四府田糧有差十八年閏七月以水免杭嚴紹金衢處等府所屬縣稅糧有差二十三年九月免杭嘉湖紹金衢台嚴等府稅糧有差三十八年十月免杭嘉湖金等府糧稅有差

萬歷二十四年十月杭嘉湖三府水照被災分數全半改折有差

萬曆二十六年九月浙江水災戶部覆巡按方元彥巡撫
劉元霖奏准除天台仙居黃巖太平各被災三分不准免
外將被災十分海寧臨安遂安桐鄉嘉善崇德六縣准免
七分被災九分安吉州仁和錢塘富陽新城鄞縣慈谿奉
化定海武義湯溪十縣准免六分被災八分餘杭於潛昌
化秀水海鹽平湖歸安烏程象山金華蘭谿東陽建德淳
安桐廬分水十六縣准免五分被災七分長興德清武康
孝豐義烏永康浦江七縣准免四分被災六分嘉興壽昌
常山三縣准免三分被災五分龍游江山臨海三縣准免
二分被災四分寧海西安開化三縣准免一分俱于本年

存留糧內照數豁免其免過銀數仍令各府州縣議處無
碍官銀抵補其嚴衛二所屯糧照災重例每石折銀三錢
二十一年以前八府未完米折鹽鈔等銀悉准蠲免

續文
蘇通

萬歷三十七年正月以浙西災准海寧餘杭臨安糧米改

折給賑浙西

明實錄

育嬰堂

附

育嬰堂舊名慈幼局宋紹興十三年詔錢塘仁和兩縣置
慈幼局收養遺棄小兒以常平錢米支給淳祐九年移局
樓店務對河元初給錢米如宋冬夏加布明萬歷中合兩

縣爲一局移建戒子橋歲久廢弛

國朝康熙五年改建于吳山之麓三十一年因舊堂窄小另建
于武林驛地方乾隆十七年改建杭捕同知衙門將嬰堂
移建南關芝松坊置造保赤柵門一座大門一座左右耳
房各一間大廳三間右首識字房三間土地祠一間堂後
乳房左右共二百間所有經費每年約計銀二千兩各邑
佃租係布政司于該縣備公項內按季扣收移送督糧道
衙門給發今錄堂中規條大畧于後

毛奇齡兩浙公建有慈
嬰堂碑記王者有慈

少之文而順時行惠則春育幼穉與秋養衰老往往並布
之明堂月令之間此後世漏澤之制所由養無告而先以
孤也顧曩時育孤大抵在保抱以後如孟子所云幼而無
父者而至于胎娩之餘甫離毛裏則前此並未及焉

國朝

順治初益都馮相國奏開育嬰堂于崇文門外畿南數百

里車携擔負口哺手糊者日接踵至及益都致政還里而

宛平相國復繼之其式遂徧于天下吾浙育嬰堂舊在吳

山之麓地偏而棟樑所輸費糧嘗不足以給日用乳婦各

散處無所稽攝巡撫張公顧而恤之于公家之暇往往咨

及而布政使馬公遂任其事會方成五達有皇華舊驛本

駐使節而鞠爲茂草久矣乃址而堵之闢堂三楹而列甲

乙舍于其傍分坏別廡設牀而鋪墊冬爐夏窰料居乳婦

于舍間有夫者共棲之使之忘內顧之憂凡竹車祭籍所

以供兒之坐卧者無勿周具且延醫師之良者以護其疾

其子保字之用心可謂極矣然又恐遲久不繼買田數百

畝爲儲俯需而立首事鄉官月稽而日核之嘗讀周書康

誥以武王之聖康叔之賢治洙邦之地之大而當時分封

伊始所諄諄告誡者日如保赤子夫民猶嬰也寒煖燥濕

饑渴勞佚口所不能言心所不能達而爲之上者以已意

而宣之達之予所好而棄所惡有如嬰然則是合帝王之

保大而後可以養一嬰極都伯重臣上下經營之全力而

後可以保一赤推之萬姓亦何異矣康熙壬申三月甫載

事而五月工竣當事者請爲文以布之

石使他日繼此者有所視因爲之記

一 嬰堂收除嬰孩添催乳媪查驗嬰孩肥瘦乳媪勤惰及給支工食口糧等事係杭州府總捕同知專司經理

一 嬰堂租息捐項滙歸杭州府衙門收貯按月聽經理之總捕同知核數移領每月于望日唱給

一 乳媪爲嬰命所寄凡遇選募必擇淳良年壯之婦令董事驗看乳汁報明經理衙門批准充額一切現在乳媪悉令歸堂居住不願入堂者汰除另選各媪夫男止許日間照應薪水不准在堂共處

一 乳媪止照食乳嬰孩口數僱募其三、四歲乾孩每媪酌派兼領一口止給乾孩口糧及每月衣服銀一錢現乳嬰

孩年至歲半卽作乾孩分派別媪兼領將本媪開除以免
虛費

一嬰堂暫救嬰命于一時不能長養于悠久所有在堂嬰
孩若不廣示居民聽其分領縱至數歲出堂別無安頓長
策勢必流爲乞丐是能生之而不能成之也經理應廣爲
曉諭凡民間有願領作子女或媳者不拘諸色人等聽其
赴堂選擇其有紳衿富戶願領爲義男義女者亦准赴領
日後長成聽其婚娶俾有終身依著寓作成于廣育之中
以免長大流落其殘疾之孩年至十歲行縣註冊頂食孤
貧名糧

一各縣租米支給口糧遇有不敷應需折價每石定價一兩六錢貴不加增賤不議減以便永遠遵行

一嬰堂房屋遇有坍塌滲漏隨時勘估修葺乳房一帶責令各媪勤加打掃潔淨不許畜養豬羊踐踏污穢

一嬰孩有疾該媪隨時告知董事一面撥醫診理一面報明經理衙門務須加謹醫治以期全活

一嬰堂各媪領乳嬰者每月每名給工食銀五錢口糧米二斗領乾孩者每月每名給衣服銀一錢口糧米二斗

養濟院

附

養濟院一名安濟坊始于宋崇寧間紹興十三年命錢塘

仁和二縣以近城寺院充安濟坊籍老幼貧乏不能自存者及乞丐之徒每人日支米一升錢十文小兒半之以常平錢米支給二縣合置安濟坊凡六所元安濟院給錢米如宋冬夏加布明洪武五年詔天下郡縣立孤老院凡孤獨殘疾不能生理者許入院官爲依例贍養如或出外乞覓鄉市人民聽以餘剩之物助養其生敢有箠楚者有司以鬪毆論誣告者抵罪此等殘疾之人如或痊可願出爲民入籍者聽從其便有司毋爲羈留定例每月支米三斗柴三十觔冬夏布各一疋小口給三分之二後又改名

養濟院

錢塘仁和二縣 養濟院一所在觀橋西北洪武八年建
計四百間

海寧州 養濟院在縣北二百五十步洪武初建

富陽縣 養濟院在會江驛之左

餘杭縣 養濟院在縣東南一里許安濟坊內成化間建

臨安縣 養濟院在縣西一里師姑橋洪武初建

新安縣 養濟院在縣治北半里

於潛縣 養濟院在縣治北石龍塢口

昌化縣 養濟院在縣西里許嘉靖年建